

EFESIOS

Pablo Toyase'e Efesios Sehuosicohua'ina

¹ Yē'ë Pablo Maija'quē yēë do'ire Jesucristo jo'yaë pa'iyē, cayē ñeje, ìpi jējo daosiquē a'è caquē. Toyayē, iye toya ja'hua Maija'quē acohua'ina, cui'ne Jesucristore sehuocohua'ina caquē, Efeso pa'icohua'ina.

² Maija'quēpi ì jo'cua de'oye pa'iyē isiquēna, cui'ne Èjaë Jesucristopi ñacaina, de'oye pa'ijē'ë.

Maire Isise'e Cristo Do'ipi

³ De'oquēre pa'ni cañu'u, Diusure, mai Èjaë Jesucristo pēca ja'quēre, Maipi Cristo ja're conì tsioni pa'i do'ire, si'aye Maija'quē cuañe tē'te aye joyo pa'iyē isiquēre.

⁴ Diusupi maire ja yē'ta'a yeja de'huama'nē Cristo do'ija'a ai oi sahuapi, ì ña hue'ñana ìna isisicohua'ipi si'si tē'ñaje peocohua'ipi pa'ijajē caquē.

⁵ Jaje pa'ina, ìpi ai oi jaje yo'osi'i cuasa nēose'eje pa'ye yo'oquē Jesucristo do'ija'a ì mamajēre coa huerosicohua'ire nepi, maire.

⁶ Jaje pa'ina, Maija'quē maire ai de'oyerepa yo'ocaise'ere cuasajē sihuañu'u. ì oi mamaquēre pana tsioni pa'i do'ire de'oyerepa maire necaisiquēre.

⁷ ì ai oi do'ire Diusupi maire ì mamaquē tsie nejosi do'ipi mai co'ayē yo'ose'ere saì de'huacai huasopi.

⁸ Jaje pa'ina, Maija'quëpi si'aye mai carajaiñere i ta'ñe asayepi cui'ne maire oiye yo'oyepi maire isipi.

⁹ Isini maire ise'e jaje yo'osi'i cuasa nëoquë pa'ise'ere, i yahuese'ere asa ti'añe necajili.

¹⁰ Jaje pa'ina, iti cuasa nëose'eje pa'ye si'aye yo'o ti'aja'quë api, Diosupi iti yo'o maca ti'asi maca. Ja maca Diosupi si'a co'amaña ma'tëmo pa'iye, cui'ne yeja pa'iye, te'ona tsioja'quë api, Cristopi meñe cuañequë pa'ijaquë caquë.

¹¹ Cristo ja're tsioni pa'i do'ire i co'amaña i ja're conì huero pajajë caquë tsoe hue'ñana Diosupi maire i tsecohua'ire paja'quë a'ë cuasa nëopi, i yëyeje pa'ye si'aye ite de'oye ña cuañoñese'e yo'oquëpi. Jaje nepi.

¹² Nequëpi maire sahua nëopi, Cristore du'ru macarepa necaiquë api cuasasicohua'ipi Maija'quë ai jerepa pa'i pa'iyere sihuajë pa'ijajë caquë.

¹³ Jaje pa'ina, de'o coca mësarute huasoyere nuñerepa cocare asa maca tsoe mësaruru Cristo ja're tsiosicohua'i pa'ë. Jaje pa'ijëna, Cristore ire pare cuasa maca i isisi'i ca nëosi de'o joyore mësaruna isipi.

¹⁴ Ja joyo cato maire Maija'quë du'ru isi nëosi joyo a'ë. Ja joyore pani asayë, mai, i tsecohua'ire huaso tëji maca, si'aye Maija'quë ca nëose'ere paja'cohua'i a'ë cajë, ja maca Maija'quëre sihuaja'cohua'i a'ë, i jerepa pa'i pa'iyere.

Pablopi Sehuosicohua'ire Sëcacaiye

15 Asaquë pa'iyë, mësaru Ējaë Jesure necaiquëre pare cuasajë pa'icohua'ipi, si'aye Maija'quë tsecohua'ireje oijë pa'iyë.

16 Jaje pa'ina, yë'ë Maija'quëre se maca mësaru de'oye yo'oyere cuasaquë si'anë de'oji caquë pëpayë, Maija'quëre.

17 Jaje pa'ina, mai Ējaë Jesucristo mëñe Diusure secacaiyë, mësaruni ta'ñe asa joyore isija'quë caquë. Isiquëna, mësarupi i iññoñe asa ti'ajë cui'ne jerepa nuñe asa ti'ajajë caquë secacaiyë.

18 Señë, cui'ne ipi mësaru cuasayena miañe necaina, mësarute caquë soise'ere utejë pa'iyere nuñerepa asa ti'ajajë caquë, cui'ne Maija'quë i tsecohua'ire isi ja'ñe airepa de'oye a'ni cajë asajajë caquë secacaiyë.

19 Cui'ne airepa jaiye a'ni Maija'quë tutu ja'rujaiñe ti peoyerepa, maire, ite sehuosicohua'ire yo'ocai tutu, cajë asa ti'ajajë caquë secacaiyë, jare iye tutupi Maija'quë si'a tuturepa yo'o iñopi.

20 Jesucristore ju'isiquëni huëoni i ëja te'tena, jeto Maija'quë cuañe te'tena ño maca,

21 ja maca si'a cuañeñere, si'aye Ējaë pa'iyere, si'a tuture si'a jo'ya ne tutu pa'ise'ere, jerepa pa'ire Cristore nepi, coa si'ayere cayë mamire hue'eyere iye yeja yure pa'iyere cui'ne si'a mu'seña pa'i ja'ñere ëjaëre pare nepi.

22 Neni si'a co'amaña i quëo huë'ehuëna oapi. Jaje pa'ina, Cristona sehuocohua'ireje isipi. Jaje pa'ina, sehuosicohua'i sïopë api, Cristo.

23 Jaje pa'ina, sehuosicohua'i cato Cristo capë acohua'i a'ë. Jaje pa'ina, Cristopi si'a sehuosi-

cohua'ire pani huesoji, cui'ne ipi si'a co'amaña
Ējaērepa pa'iji.

2

Maija'quē Oi Do'ire Huasosicohua'i Pa'iyē

¹ Ja'nē mēsaru co'aye yo'oyena cui'ne cuñese'e
tayo yo'oyena ju'isicohua'ipi paē'ē.

² Pa'ijē iye yeja pa'i yo'oyere, iye de'otose'e
cuñequē, Maija'quēre sañope yo'ocohua'ire
cuaquē yēyere yo'ohuē.

³ Jaje mai si'aohua'i ja'nē mai capē yēyere
co'ayere yo'ohuē, iye yeja pa'i coa noni yo'ojē
pa'iyere, mai cuasayere. Jaje coa noni yo'ojē pa'i
do'ire Maija'quēni nejo cuño ja'ñe pa'iohua'ipi
paē'ē.

⁴ Jaje pa'iquēta'are, Maija'quē paire teaye ñani
cōcaiquēpi maire ai oi,

⁵ ja yē'ta'a mai co'aye yo'oyena ju'isicohua'ipi
pa'ijēna, pa'iyere isipi Cristo do'ipi. Jaje pa'ina,
mēsaru Maija'quē oi de'oye yo'o do'ire huaso
cuñosicohua'i pa'iyē.

⁶ Jaje pa'ina, Maija'quēpi maire ju'isicohua'ini
Cristo Jesús ja're huēoni i ja're te'e ñopi, Maija'quē
cuñe tē'tena.

⁷ Iye cato yo'opi Cristo Jesús do'ipi maire i ai
oiyere, cui'ne i de'oye maire yo'ocaise'ere yequē
mu'seña maire iñosi'i caquē.

⁸ Jaje pa'ina, mēsaru Maija'quēpi de'oye oi
yo'o do'ire huaso cuñosicohua'i pa'iyē payē,
necaiquēre pare ite cuasa do'ipi. Iye mēsarupi
yo'ojē tī'ase'e peoji, coa Maija'quēpi mēsarute
isise'e a'ē,

9 cui'ne mäsaru yo'o do'ipi etase'e peoji. Jaje pa'ina, te'iję yël'ępi nehuë, ca tı'añeje peoji.

10 Maija'quë co'amaña'ë, mai i nesicohua'i a'ë. Jaje pa'ina, Maija'quë tsoe hue'ña ne de'huacaise'eje pa'ye Cristo do'ija'a de'o co'amaña yo'oja'cohua'ire nesicohua'i a'ë.

De'oye Pa'iyę Cristo Do'ipi

11 Cuasajë'ë, ja'në mäsarute paı tēase'ere hue'ecohua'ipi judío paıpi ca'ni tēama'cohua'ire hue'yose'ere judío paı peo do'ire.

12 Ja'në cato mäsaru Cristore peocohua'ipi, Israel paı peocohua'ipi, Maija'quë ca nēose'ere peocohua'ipi, yequë mu'se pa ja'ñere uteye peocohua'ipi. Diusureje peocohua'ipi te'ohua'i iye yęjana ne huesësicohua'ipi paël'ë.

13 Jaje pa'iquęta'are yure mäsaru Cristo Jesús tsie do'ipi ina tsioni ja'yere pa'iyë, ja'në ite so'ore pa'isicohua'ipi.

14 Cristo api, mai jo'cua de'oye pa'iyę. İpi judío paıre cui'ne judío paı peocohua'ireje te'e tsëcapëna nepi. Tsoe nejopi, ta'tëpo, yecohua'i a'ë cajë pa'ise'e.

15 Jaje pa'ina, Cristo mai tayo do'ire sai de'huani i capëpi Moisés cuañeñe coa pa'iyę nepi, caya paı tsëca pa'ise'ere te'e huajë paı tsëcapë pa'ija'quë caquë. Jaje neni jo'cua de'oye pa'iyę nepi.

16 Jaje Cristo i cruz ju'i do'ipi caya tsëca pa'ijë uihuayere nejoni te'e paıre nepi. Neni Maija'quë ja're jo'cua de'oye pa'iyę necajı'i, maire.

17 Mäsaru so'ore Maija'quëre pa'icohua'ire cui'ne judío paıre, ite ja'ye pa'icohua'ire

si'aohua'ire jo'cua de'oye pa'iyere, de'o cocare quëasi'i caquë Cristo daji'i.

¹⁸ Jaje pa'ina, yureta'a Cristo do'ija'a si'aohua'i judío cui'ne judío pa'i peocohua'ije Maija'quëna tsiojaiñe pa'iji, maipi te'e joyore hue'e do'ire.

¹⁹ Jaje pa'ina, mësarü tío hua'i peoyë, yecohua'i yejare pa'icohua'ije pa'iohua'i pa'iyë. Jaje pa'ina, yure mësarü cato Maija'quë pa'i ja're coní te'e pa'iyë, Maija'quë do'ijë acohua'i de'osicohua'ipi.

²⁰ Mësarü jai huë'eje pa'iohua'i a'ë. Jaje pa'iohua'ipi i jëjo saocohua'i cui'ne Maija'quëre quëacaicohua'i nesicona, mëñe nesicohua'ipi pa'iyë, Jesucristo cato ne huëojë du'ru macarepa oasi quëna pëje pa'i api.

²¹ Cristona si'a huë'e quëco paco ina tsiosicorepa pa'io, jerepa jaico ai de'oja'co, Ejaërepa de'o huë'erepa pasi'i caco.

²² Jaje cui'ne mësarüje, si'aohua'i Cristona tsioni pa'ijë, Maija'quë joyo pa'i huë'e pa'iyë.

3

Judío Peocohua'ire Quëaquë Api Pablo

¹ Yë'ë Pablo, Jesucristona tseä cuañosiquë a'ë, mësarü judío pa'i peocohua'ini caquë.

² Jaje pa'ina, Maija'quë mësarute oi coa isiyere yë'ëpi quëacaijaquë caquë ipi cuñe nëopi cajë asayë, cuasayë.

³ Jaje pa'ina, Diusupi i yahue cuasa nëose'ere yë'ëna quëa iñopi. Jare yë'ëpi i quëase'eje pa'iyë mësarute a'ri maña quëaquë toyahuë.

⁴ Yë'ë toyase'ere ñajë mësarü asa tija'cohua'i a'ë, yë'ëpi Cristo aye yahuese'ere asaquë pa'iyë.

⁵ Iye cato cayë tsoe acohua'ire i cuasa nëose'e iñoma'ë yahueni pase'ere, jare yure i joyopi i de'ocohua'ire pare jëjo saocohua'ina, cui'ne ite quëacaicohua'ina, yo'oyeja'a Maija'quëpi iñopi, si'aye.

⁶ Iye a'ë, iti yahuese'e cato: Cristo Jesús do'ija'a Maija'quë ca nëose'ere huaso coca quëayeja'a, judío pai peocohua'ipi, judío pai pa ja'ñere te'e cui'neje si'a yë'quë maca pa ja'ñe a'ë, i capë acohua'i pa'i do'ire.

⁷ Maija'quë yë'ëre oi coa isise'ejä'a Diusu tutupi iye coca quëacaiquëre nesiquë a'ë, i yëyeje.

⁸ Yë'ë, Maija'quë tsecohua'i seña maca huë'ehuërepa pa'iquëni, Maija'quëpi coa isipi, judío pai peocohua'ire, jaiye de'o co'amaña cuëcue ti'añe peoyerepa Cristo payere, de'o coca quëayere.

⁹ Si'aye co'amaña de'huasiquëpi Diusupi yë'ëre i tsoe hue'ña cuasase'ere yahuese'e pase'ere si'ahua'ire quëa iñoja'quëre nepi.

¹⁰ Jaje paji'i, yure sehuosicohua'i pa'iyeja'a cuañecohua'ipi cui'ne ëjaohua'ipi joñoase'e pa'i hue'ñana Diusu ta'ñe yo'oyere si'aye ña ti'ajajë caquë.

¹¹ I cuasa nëo huesose'eje pa'ye cui'ne yo'opi, Diusu, mai Ejaë Jesucristo do'ija'a si'aye ne sao maca.

¹² Jaje pa'ina, Cristo do'ipi Diusuna de'hue a'jiñe tsiojaiñe payë, asajë mai, ite de'hue necaiquë api cuasa do'ija'a.

¹³ Jaje pa'ina, señë, mësarute. Yë'ë mësaruni caquë ai yo'oyere ñani yo'o jujama'pë pa'ijë'ë. Yë'ë ai yo'oye cato mësaruni jai do'i quë'iohua'i pa'iye

iñoquë yo'oye a'ë.

Jesús Oíye

¹⁴ Iyere caquë mai Ējaë Jesucristo pëca ja'quë ña hue'ñana do're ja'ruyë,

¹⁵ si'a i tsëcapë ma'tëmo pa'icohua'i cui'ne yeja pa'icohua'i i mamire hue'ejë pa'iquëna.

¹⁶ Do're ja'runi Maija'quëre señë, i de'lo co'amañare pare mësaru joyona Maija'quë joyo yo'o do'ipi jerepa pa'yere tuture isijaquë caquë.

¹⁷ Cui'ne ite pa'iji cuasa do'ipi Cristopi mësaru joyore pa'ija'quë pa'ina, Cristo paire oiyena jëayerepa tsita mesicohua'ipi pa'ijë.

¹⁸ Si'a sehuosicohua'i ja're coní Cristo paire oíye: je'ñe tëcapë jaiye, tsoaye, huaiñe, cui'ne mëñe tsoaye asa ti'aja'cohua'i a'ë caquë señë.

¹⁹ Señë, cui'ne mai asaye jerepa tëto saise'ere paire oiyere asa ti'ajajë caquë, jaje asa ti'ajë Diosu oiyepi timësicohua'i pa'ijajë caquë.

²⁰ Yure airepa de'oquëre pa'ni Maija'quë cajë sihuañu'u, i tutupi maija'a yo'ocaiquëre pare, si'aye mai pañu'u cajë señe maña, panita'a mai cuasaye maña, jerepa de'oye necai tutu paquëre.

²¹ De'oquëre pa'ni Diosu, cajë sihuañu'u, sehuosicohua'i Ējaëre, Cristo Jesús do'ipi. Jajese'e si'anë tsoejë ite sihuajë pañu'u. Jaje pa'ijaquë.

4

Te'ije Pa'iohua'i Pa'iyë, Te'i Joyopi Pa'i Do'ire

¹ Ējaëre tseá cuañosiquëpi señë, mësarute Maija'quë caquë soise'eje pa'ye nuñerepa pa'ijë'ë caquë.

2 Jaje pa'ina, jerepa pa'iohua'i a'ë cuasama'cohuaipi paire oicohua'ipi, pai ñape tiñe cuasayere sañope cama'cohua'ipi quëcocoehua'ipi oicohua'i pa'ijë'ë.

3 Jaje pa'ijëna, mësarü jo'cua pa'iyepi necaina, Maija'quë joyopi cöcaina, si'anë tsiosicohua'ipi pañu'u cajë de'hua ñajë pa'ijë'ë.

4 Te'e capë cui'ne te'e joyo pa'iji, Maija'quë mësarute te'ore utejë pa'iyena soise'eje pa'ye.

5 Pa'iji, te'e Ejaë. Pa'ico, te'o Maija'quëre cuasaye, te'e oco doye pa'iji.

6 Pa'iji, te'e Diusu si'aohua'i pëca ja'quërepa. Jaëpi pa'iji, si'aye ëmëje'e te'tere pare, si'aohua'ire tsioquë yo'oquë cui'ne si'aohua'ire tsioni pa'iquërepa.

7 Jaje pa'iquëta'are Cristopi mai yo'oja'a tuture pai ñapere i yëyeje pa'ye isipi.

8 Jaje pa'ina, toyase'e caji:

I ma'tëmo mëi maca, te'e i ja're conï tsea cuañosicohua'ireje sapi.

Saquë i yo'o tuture paina isipi.

9 “Mëji'i” canï, cayë du'ru yejare pana cajesiquëpi mëji'i cajë.

10 Iti cajesiquëpi jare ipi mëji'i ai ëmërepa ma'tëmona, si'aore i pa'iyepi timësi'i caquë.

11 Jare ipi pai ñapere isipi, yo'oja'a tutu, yecohua'ini i jëjo saocohua'ire nepi, yecohua'ini Maija'quë caquëna, asase'ere quëacaicohua'ire nepi, yecohua'ini huaso cocare quëaja'cohua'ire nepi. Yecohua'ini yëi ñamare ñacaiyeje pa'ye sehuosicohua'ire ñacaicohua'ire nepi. Cui'ne yecohua'ini de'oye ye'yaja'cohua'ire nepi.

12 Jaje i tsecohua'ire yo'oja'a tutu isipi, i yëyere yo'ojajë caquë. Yo'ojëna, Cristo capë acohua'ipi ai de'ojajë caquë iohua'i necai do'ipi.

13 Jaje pa'ina, i ne de'huasicohua'ipi necaiye pa'iji, si'aohua'i te'i cuasayeje pa'ye Maija'quëre cuasajë pa'i macaja'a cui'ne Maija'quë mamaquëre asa ti'a macaja'a. Ja maca yureta'a joyo aïohua'irepa de'oni Cristo ja'ïohua'irepa pa'ija'cohua'i a'ë, si'aohua'i.

14 Ja maca tsije pa'ïohua'i pa'iye paja'cohua'i a'ë. Tsi cato iohua'i cuasase'e esa jeoni yeque cuasayena a'jiñe pönëcohua'i a'ë, tayosi ma'a saicohua'i cosoyena sehuocaijë.

15 Jaje pa'ina, mai cato joyopi paire oiyere nuñerepa cocare cajë ñese ai de'oye pa'iji si'aye pa'ïohua'irepa, Cristo sehuosicohua'i siopëna tsioni pa'ijë.

16 Jaje pa'ina, Cristo do'ipi si'a capë jëayerepa sa'ñe si'a te'ña tsio huesëji, te'oje pa'iorepa. Jaje tsioni si'a te'ña de'oye yo'ojëna, si'a capë ai de'oji, sa'ñe oiyena.

Huajë Pa'iye Cristo Do'ipi

17 Iye a'ë, yë'ë mësarute mai Èjaë mamipi cuañequë caye: Pa'ima'pë pa'ijë'ë, ja yë'ta'api Maija'quëre cuasama'cohua'i pa'iyeje pa'ye. Jaohua'i cato pa'iyë, coa noni do'i peoyere cuasajë pa'iyepi.

18 Jaje pa'ïohua'ipi sëtama'cohua'ijë pa'ye de'oye cuasama'cohua'i a'ë, Satanáspi iohua'ire ñamije pa'ye necai do'ire. De'oye cuasama'cohua'ipi nuñe coca coe do'ire huesësicohua'ipi pa'iyë. Jaje pa'ijë Maija'quë pa'iyë peocohua'ipi pa'iyë.

19 Jaje pa'ina, huajëya'ye nëiñe peocohua'ipi si'aye co'ayere yëyena dahuëyesicohua'ipi pa'ijë, ja'rujaiñe peoye, coa si'aye si'si co'amañare yo'ojë pa'iyë.

20 Jaje yo'ojë pa'iyere Cristo mësarute ye'yama'ë paji'i.

21 Jaje pa'ina, mësarupi nuñerepa coca paquëni, i cayere asasicohua'i pani, cui'ne i pa'iyere ye'yesicohua'i pani,

22 jeocojë'ë, mësaruru tsoe pa'ise'ere, sehuoma'cohua'i pa'ise'ere. Ja tsoe pa'ise'e yëyepi cosoquë co'ayena sayere.

23 Jeocojëna, si'a mu'seña huajë yëyere cui'ne cuasayere pa'ye pa'iji.

24 Jare pajë huajë pa'iyere pajë'ë, cañare suñañeje pa'ye. Iye huajë pa'iyere cato Maija'quë nuñerepa pa'iyeye, cui'ne Maija'quë de'oyerepa pa'iyeye nese'e a'ë.

25 Jaje pa'ina, ja yë'ta'api cosoma'pë pa'ijë'ë. Coa ai jerepa pai ñape nuñerepa cocapi cajë'ë, paire. ¿Si'aohua'i te'e capë acohua'i me yeque yo'oye'ni?

26 Pëicohua'i pani, ti pëni huesëma'pë pa'ijë'ë, tayoye. Pëtise'e cajë na'ijaima'pë pa'ijë'ë.

27 Huatire sa'ro nëocaima'pë pa'ijë'ë.

28 Co'amaña yahue imaquë pa'isiquë pani jeojë'ë, ja yo'oye. Jeoni co'amaña ne huëojë'ë, më'ë jëtëpi, de'oye co'amaña yecohua'ire carayere isisi'li caquë.

29 Si'si cocare cama'pë pa'ijë'ë. Coa ai jerepa iti asacohua'ire de'oye pa'iyere necaiyere, cui'ne jerepa ñese mëiñe necaiyere cajë'ë.

³⁰ Maija'quë mësaruna i joyore isipi, i tsecohua'irepa iño ja'ñere mësarute huaso tēji mu'serepa. Jaje pa'ina, co'a coca cayepi ne oema'pë pa'ijë'ë, Maija'quë joyore.

³¹ Jeocojë'ë, yecohua'ire saisi'i caquë oi joyo pa'iyere: pëi sañope cuasayere, pëi sañope yo'oyere, sañope tutu cayere, cui'ne yecohua'ire co'acohua'i a'ë cayere. Coa si'aye yecohua'ire sañope yo'o ayere jeocojë'ë.

³² Jeoni sa'ñe oijë cocaijë'ë. Cui'ne yecohua'ire sai de'huacaijë pa'ijë'ë, mësaru co'aye yo'o do'ire Cristo do'ipi Maija'quë sai de'huacaise'eje pa'ye.

5

Maija'quë Mamajë Pa'iyë

¹ Mësaru Diusu oi mamajë sēte ije pa'iohua'i pañu'u cajë, yo'ojë'ë.

² Cristo maini oi ija'a co'ye Maija'quëna isiquë jucacaiji'i. Ja yo'oye cato de'oye ma'ña sēñeje pa'ye a'ë, Maija'quëna. Ja yo'oyepi maire i oiyere iñopi. Yureta'a i oiyeje pa'ye yecohua'ire yo'oñu'u. Jare yo'ojë pa'ijë'ë.

³ Jaje pa'ina, yure Maija'quë acohua'i pa'iyë sēte nomiohua'i paye coca caye ti cama'pë pa'ijë'ë, cui'ne si'a si'si yo'o cocare cui'ne si'aye pa ëaye nēi cocare ti cama'pë pa'ijë'ë.

⁴ Cui'ne cama'pë pa'ijë'ë, si'si cocare, coa cayere, cui'ne ca'a cocata'a si'ayere co'aye yo'oyena cuasa huëoyere cama'pë pa'ijë'ë. Coa ai jerepa mësaruse'e, Maija'quëre de'oji cajë pëpaye pa'iji.

⁵ Mësarupi toe ta'ñe asayë, yequë nomiore panita'a yequë ëmëre yo'ocohua'ipi, panita'a

si'sire yo'ocohua'ipi, pa_nita'a jaiye co'amañare paye yëcohua'ipi Cristo cui'ne Diusu cuañe te'te cacaye ti peoyë. Jaiye co'amañare yëcohua'i cato pa_i de'huasi Diusuni señeje pa'iohua'i a'ë.

⁶ Iye tayo yo'oyere de'oye a'ë cacohua'ini coso cuañoma'pë pa'ijë'ë. Jaje yo'ocohua'ire Maija'quëpi pëi nejoja'quë api, i_te sehuocaima'pë yo'ocohua'ire.

⁷ Jaje pa'ina, mësaru ja_ohua'ire tsioma'pë pa'ijë'ë.

⁸ Ja'rë mësaru nea hue_ñare paë'ë. Yure mai Ëjaë ja're tsioni pa'i do'ire mia hue_ñare pa'iyë. Jaje pa'i sëte mia hue_ña pa_i sëte de'oye pa'iyepi pa'iji.

⁹ Iye miañepi iyere neji: de'oye yo'oyere, nuñerepa cayere cui'ne tayo saima'pë pa'iyere.

¹⁰ Maija'quë yëye yo'oyere ye'yejë'ë.

¹¹ Cui'na maca yo'oma'pë pa'ijë'ë, co_cai ma'ñere, nea hue_ña acohua'i yo'oyere. Coa ai jerepa co'ayere mia hue_ñana eto i_ñojë'ë.

¹² Jaje pa'ina, sehuoma'cohua'i yahue yo'oyere cayequë huajëya'ji, maire.

¹³ Jaje pa'iquëta'are miañepi yahue yo'ose'ena ju'aquëna, si'aye ti_ñarepa ña_ñe pa'iji. Jaje pa'ina, si'ayere yahue yo'ose'ere co_ni i_ñoja'quë api, miañepi.

¹⁴ Jaje pa'ina, case'e pa'iji:

Sëtajë'ë, caiquë,
ju'isicohua'i jopopi huëijë'ë,
Cristopi miacaija'quëre.

¹⁵ Jaje pa'iyë sëte de'hua mësaru yo'o_jë pa'iyere ñajë pa'ijë'ë. Huesëohua'ije pa'iohua'i pa'ima'pë, coa ai jerepa ta_ñerepa asajë pa'ijë'ë.

16 De'o co'amañare esa nejë'ë, co'a mu'señare pa'i do'ire.

17 Coa huesërepa yo'oma'pë pa'ijë'ë, du'ru macarepa jere Ëjaërepa yëquë'ni cuasani, ì yëyere yo'ojë'ë.

18 Cono cüepema'pë pa'ijë'ë. Ja cato nëajaiñe peoyerepa coa yo'oyena saye a'ë. Ai jerepa Maija'quë joyopi timësicohua'ipi pa'ijë'ë.

19 Pa'ijë tsoe jëjëñe toyase'epi sehuosicohua'i jëjëñepi cui'ne joyo jëjëñepi sa'ñe cajë pa'ijë'ë, cui'ne iye jëjëñepi jëjëjë si'a joyorepapi sihuajë Maija'quëre de'oquëre pa'ni cajë pa'ijë'ë.

20 Si'anë Maija'quëre de'oji, cajë pëpajë pa'ijë'ë, mai Ëjaë Jesucristo mamipi.

Sehuosicohua'i Huë'e Pa'ie

21 Sa'ñe de'oye sehuojë pa'ijë'ë, Maija'quëre ca'ra do'ipi.

22 Nëjohua'i ëjëre de'oye sehuocaijë pa'ijë'ë, mai Ëjaëre sehuoyeje pa'ye.

23 Cristo sehuosicohua'i mëñe siopë api, cui'ne pa'ye ëjëje nomio mëñe siopë api, Cristo sehuosicohua'ire huasoquë api, ì capë acohua'ire.

24 Jaje pa'ina, Cristore sehuosicohua'i de'oye ì cuañeñe sehuojë pa'ieje pa'ye cui'ne nëjoje ëjëre si'aye sehuoco pa'ieje pa'iji.

25 Ëjëpi nëjore oiye pa'iji, Cristo oi ì oiyere iñoquë sehuosicohua'ire jucacaise'eje pa'ye.

26 Jaje pa'ina, ì tsecore pare nëjoje pa'iore pasi'i caquë Maija'quë coca quëa do'ija'a Maija'quë joyo ocopi tsoa topi si'a ìte sehuocohua'ire.

27 Jaje tsoa topi i ñaquë payere caquë si'si te'ñaje, sějē, cui'ne yeque co'aye ña cuañoñe peocore pani de'oconi i tsecore pasi'i caquë.

28 Jaje pa'ye ëjēohua'ipi nējohua'ire oiye pa'iji, iohua'i capëa oiyeje pa'ye. Nējore oiquë cato ija'a co'ye oiyeje pa'ye oiji.

29 Co'ye iohua'i capëre coecohua'i peoyë, pai. Coa ai jerepa aojë cui'ne ñacaicohua'i a'ë. Jaje cui'ne Cristoje ite sehuosicohua'ire i capë acohua'ire ñacaiji.

30 Jaje pa'ina, mai i capë cui'ne tara acohua'i a'ë.

31 Jaje pa'ina, ëmëpi huejaquë pëca ja'quëre cui'ne pëca ja'core jeoñe pa'iji, nējona tsioyere caquë. Ja maca cayahua'i pa'isicohua'ipi tsioni te'ije pa'iohua'i pa'ija'cohua'i a'ë.

32 Iye cato yahuese'e a'ë. Jaje me asaye'ni pa'iquëta'are y'ë cato cayë, Cristopi ite sehuocohua'i ja're tsioni pa'iyē ayere.

33 Jaje pa'iquëta'are pai ñape ëmë nējore oiye pa'iji, i capë oiyeje pa'ye, cui'ne nomiopī ëjēre io ëjaëre pare dahuëre ñaco pa'ijaco.

6

Mamajë Cui'ne Pëca Ja'quëohua'i Pa'iyē

1 Mai Ejaëre sehuocohua'i sëte mësarū ja'quëohua'i cuañeñere de'oye sehuojë yo'ojë pa'ijë'ë. Jaje yo'oye nuñere pa'ë.

2 Moisés cuañese'epi ca nëose'e pacopi du'ru acopi caco ñeje: “Më'ë ja'quëre cui'ne më'ë ja'core oi ëjaohua'ire ñaquë pajë'ë, jai do'i quë'iohua'ire cuasaquë.

3 Jare yo'oquëpi iye yejare ai tsoe sihuaquë de'oye pa'ija'quë api."

4 Cui'ne mësarujë ja'quëohua'ije, mësarü ma-majëre pëti äaye ne huëoma'pë pa'ijë'ë. Coa ai jerepa tayoyese'e nu'ñejë ye'yajë ai de'huajë'ë, mai Ëjaë oi yëhuoye ayepi.

5 Jo'yaohua'i iye yeja mësarü ëjaohua'ire de'oye sehuocaijë'ë. Cristore necaiyejë pa'ye cuasajë. Ëjaohua'ire ñajë, ca'rajë nuñere papi yo'ojë necaijë'ë.

6 Iohua'i mësarute ña macase'e de'oye yo'oyejë pa'ye yo'oma'pë pa'ijë'ë, coa ai jerepa si'a joy-orepa de'oye cuasajë nejë'ë, Diosu yëyejë pa'ye, Cristo jo'yaohua'i sëte.

7 Mai Ëjaëre necaiyejë pa'ye de'oye cuasajë si-huajë paire co'amaña de'oyerepa necaijë'ë.

8 Tsoe mësarupi asayë, pai ñapere iohua'i yo'ose'ejë pa'ye jo'yaohua'ire cui'ne jo'yaohua'i peocohua'ire Ëjaëpi isi ja'ñe.

9 Ëjaohua'ije de'oye yo'ojë'ë, mësarute necaicohua'ire. Tutu cajë yo'oma'pë pa'ijë'ë. De'hua cuasajë'ë, mësarü cui'ne jaohua'i te'e Ëjaëni ma'tëmo aquëre payere, si'a yë'quë maca si'aohua'ire ñaquëni.

Sehuosicohua'i Joyopi Uihua Co'amaña

10 Yure cato Maija'quë do'ijë, i tutu jerepa pa'yena tsioni i ja're pa'ijë, tutu quë'iohua'i pa'ijë'ë.

11 Si'aye huati cosoyere, sañope quëco saojë'ë, ocue pa'i macarepa pa'iyere cajë, Diosu uihua ja'ñe isise'epi.

12 Mai cato uihuama'pë pa'iyë, paini capë cui'ne tara quë'iohua'ini. Mai cato uihuayë, maire meñe cuañe tutu payere, huati cosoye tutu quë'iyere uihuayë, iye mu'seña nea hue'ña huati ëjaohua'i quë'i cuañe tuture. Maija'quë tē'tepi sañope uihuayë, co'ayepi maina cacayere ësejë.

13 Jaje pa'ina, co'a mu'se tī'aëna, quëcoyere cajë Maija'quë mësarü uihuaja'a caña isise'ena suñasicohua'ipi pa'ijë'ë. Jaje pa'ijë quëcosi jeteyo'je taima'cohua'irepa pa'ija'cohua'i.

14 Soldado uihua tēicare suñañeje pa'ye nuñere pare suñasicohua'ipi ocue pa'i macarepa pa'ijë'ë, cui'neje soldado coti saihuë jëacaicore suñañeje pa'ye nuñerepa yo'oyere suñasicohua'ipi ocue pa'i macarepa pa'ijë'ë.

15 Cui'ne Maija'quë coca jo'cua pa'iyepi ne de'huasicohua'i pa'ijë'ë, soldado zapato suñase'eje pa'iohua'i.

16 Cui'ne mësarü Maija'quëre pa'iji cuasayere mësarute jëacai cua'arepa pajë'ë, huati hua'jo ñaña toa quë'yepi daina, si'aye ne yayoja'core.

17 Cui'ne mësarü huaso cuañose'ere quëna mapëje pa'ioire pajë'ë, siopë jëacaicore pajë cui'ne Maija'quë joyo hua'tiyore Maija'quë cocare isicohua'i pa'ijë'ë.

18 Cui'ne Maija'quëre seña jëoma'pë si'anë ai sejë pa'ijë'ë, Maija'quë joyo cayeja'a. Yo'o jujahuë cuasama'pë, ocue pa'i macarepa cui'ñasicohua'ipi pa'ijë si'aohua'ire Maija'quë tsecohua'ire secacaijë pa'ijë'ë.

19 Cui'ne yë'ëreje secacaijë'ë, Maija'quëpi yë'ë ca ja'ñe isiquëna, caquë huaso coca yahuese'ere tiñarepa asa tī'añe, quëcoquë caja'quëre.

20 Maija'quëpi yè'ëre, iye cocare quëacaijaquë caquë jëjo daosiquë a'ë, jare quëa do'ire, yure yè'ë co cuañosiquë pa'iyë. Secacaijè'ë, yè'ë ca'rama'ë i coca quëacai ja'ñere.

21 Tíquico Maija'quë do'iquë, mai oiquëpi, jëoñe peoyerepa mai Ëjaë co'amaña cõcaiquëpi, si'aye quëasipi, yè'ë iño pa'iyë, cui'ne yè'ë yo'oquë pa'iyëje.

22 Jaje pa'ina, jëjo saoyë, mësaru quë'rona ipi sani iño yëquë pa'iyere quëaquë, mësarute jerepa yèjè de'oye yo'oja'cohua'ire nejaquë caquë.

23 Diusu Maija'quëpi cui'ne Ëjaë Jesucristopi Maija'quë do'ijëre jo'cua pa'iyë sa'ñe oiye isijaquë Maija'quë pa'iji cuasa do'ire.

24 Cui'ne Maija'quëpi i oiye yeque ponama'quëpi de'oye ñacaijaquë si'aohua'i Jesucristore oicohua'ire.

Maija'quë Huajë Ca Nëose'e
New Testament in Secoya (EC:sey:Secoya)

copyright © 2012 Wycliffe Bible Translators, Inc.

Language: Secoya

Translation by: Wycliffe Bible Translators, Inc.

Secoya [sey], Ecuador

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Secoya

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

995e68c5-fe57-54e6-bf8e-0637526d3f7d